

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

1. प्रधानमंत्री नरेन्द्र मोदी होरें आखेआ ऐ जे भारत, पर्यावरण लेई वैश्विक फैशन दे नजरिये दी अगुवाई करी सकदा ऐ।
2. लेफ्टिनेंट गवर्नर मनोज सिन्हा होरें आखेआ ऐ जे जम्मू दा विकास ते एहदी विरासती थाहरें च नमें सिरिया जान भरना उं'दे प्रशासन दी इक बड़्डी प्राथमिकता ऐ।
3. मुख्यमंत्री ओमर अब्दुल्ला होरें आखेआ ऐ जे उं'दी सरकार दा बजट, छडा अधिकारिक फैसलें गी गै नेई, गुआं आम लोकें दिएं आसें—तांगें गी दर्शाग। उं'नें आखेआ जे लोकें दिएं आसें—मेदे गी पूरा करदे होई बजट दा निर्माण कीता जा'रदा ऐ।
4. शिक्षा मंत्री सकीना इत्तू होरें आर्थिक तौरा पर कमजोर श्रेणी दे 250 बच्चें गी 'वतन को जानो' आहले दौरे पर रवाना कीता।
5. जल शक्ति मंत्री जावेद राणा होरें आखेआ ऐ जे सरकार पानी दी किल्लत आहले इलाकें च मुफ्त टैंकर सेवा शुरू करोग।

<><><><><><>

PM Bharat Tex 2025 Revised

प्रधानमंत्री नरेन्द्र मोदी होरें आखेआ ऐ जे अज्ज दुनिया पर्यावरण ते सशक्तिकरण लेई फैशन दे नजरिये गी अपनाऽ करदी ऐ ते भारत इस सरबंघै च दुनिया दी अगुवाई करी सकदा ऐ। उं'नें आखेआ जे टिकाउपन, भारती कपड़ें ते भारती परंपराएं दा हिस्सा रेहा ऐ ते भारत च कुदरत दे अनुकूल कपड़ा तैयार करना, कुदरती रंगें दा इस्तेमाल, भारती कपड़ा निर्माण परंपराएं दा हिस्सा रेहा ऐ। नमीं दिल्ली दे भारत मंडपम च आयोजित भारत-टेक्स 2025 गी संबोधित करदे होई प्रधानमंत्री होरें आखेआ जे भारत नै अपनिएं परंपराएं गी नमिं तकनीकें कन्नै जोड़ियै नां छड़ा इस खेत्तर च अपना दबदबा कायम रखे दा ऐ ते कन्नै अपने बुनकरें, कपड़ा निर्माण कन्नै जुड़े दे कारीगिरें, महिलाएं ते युवाएं लेई नमें—नमें मौके पैदा करा'रदा ऐ।

प्रधानमंत्री होरें आखेआ जे सरकार दा मकसद 2030 तोहड़ी कपड़ें दे निर्यात गी 3 लक्ख करोड़ रुपें थमां बघाइयै 9 लक्ख करोड़ रुपें तगर आहनना ऐ। उं'नें आखेआ जे भारत ऐल्लै भारत कपड़ें दे निर्यात करने आहला दुनिया दा 6मां सब्बनें शा बड़्डा मुल्ख ऐ।

<><><><><><>

LG Jammu Aarti

लेफ्टिनेंट गवर्नर मनोज सिन्हा होरें मुकामी करोबारिएं, उद्यमिएं ते कम्मगारें दे विकास दी जरूरतै उप्पर जोर पांदे होई जम्मू दे चबक्खे विकास लेई अपने प्रशासन दी वचनबद्धता गी फही पक्का कीता ऐ। एह गल्ल उ'नें श्री रघुनाथ जी की जम्मू आरती च हिस्सा लेंदे होई आखी। इस मौके उप्पर एलजी होरें सरकार दिएं मुख्य पैहलकदमिएं उप्पर लोऽ पाई जि'दे च मुबारक मंडी थमां लेइयै रघुनाथ बजार तगर दे इलाके गी शैल स्नाकड़ा बनाना, आध्यात्मिक सैलसफा सर्किट विकसित करना ते खित्ते दिएं सैलानी ते धार्मिक थाहरें उप्पर उपलब्ध सुविधाएं च बाददा करना शामिल ऐ। पिछले 5एं ब'रें गी जम्मू लेई इक सनैहरी अवधि करार दिंदे होई एलजी होरें खित्ते दे विकास लेई लम्मी अवधि आहले नजरिये ते लोकें दी खुशहाली दी जरूरतै पर जोर पाया। उ'नें समाज दे सब्बनें तबकें गी गुजारिश कीती जे ओह बंड पोआने आहली ताकतें खलाफ इकजुट रौहन ते जम्मू गी आध्यात्मिक ते आर्थिक गतिविधिएं दा इक बड़डा केन्द्र बनान।

<><><><><><>

CM Pre Budget

मुख्यमंत्री उमर अब्दुल्ला होरें सिविल सचिवालय च जम्मू जिले दे जल प्रतिनिधिएं कन्नै बजट शा पैहले सलाह मशवरे आली इक बैठक दी अध्यक्षता कीती जेह्दे च बजट बनाने दी प्रक्रिया च चुने गेदे प्रतिनिधिएं गी शामिल करने दे महत्व पर जोर दित्ता गेआ। मुख्यमंत्री होरें जोर देइयै आखेआ जे बजट लेई छड़ा दफतरे च मसौदा तैआर नेई कीता जाना चाहिदा सगुआं एह्दे राएं लोकें दिएं आकांक्षाएं गी बी दर्शाना लोड़चदा ऐं बैठक दरान चुक्के प्रमुख मुद्दे च शिड़कें दा बुनियादी ढांचा, सिंचाई, पीने दा पानी, जल निकासी ते नशीली दुआइएं दे दुरुप्योग दे खलाफ कीते जाने आली जुगतां शामिल हियां। प्रतिनिधिएं बेहतर सेहम दिक्खभाल, शिखा, खेड्ड सुविधाएं ते सैलसफा गी बढ़ावा देने दी लोड़ पर बी जोर दित्ता गेआ। इस मौके पर मुख्यमंत्री होरें इस गल्लै पर जोर दिंदे होइ आखेआ जे लोकें दी आवाज गी बजट राएं आकार देना खहिदा।

<><><><><><>

LoC Poonch

पुंछ जिले दे गुलपुर सैक्टर च कब्ज़ा रेखा कश भारत दी इक चौकी पर पाकिस्तान आसेआ गोलीबारी कीती गेई जेह्दा भारती बलें बी तुरत बनकदा परता दित्ता। आकाशवाणी दे जम्मू संवाददाता दी रिपोर्ट मूजब, भारती जवानें गी निशाना बनाने लेई पाकिस्तान दी तरफा स्नाईपर हमला कीता गेआ हा जेह्दे पर बनकदी कार्रवाई कीती गेई। उ'आं अजें इब्बी साफ नेई होआ ऐ जे एह हमला पाकिस्तान फौज नै कीता हा जां फही जंगलें च घुसपैठ लेई छप्पियै बैठे दे आतंकवादिएंदकीता, उआं इस हमले च कोई नुकसान नेई होआ ऐ।

<><><><><><>

दूर दरेड़े इलाकें दे विद्यार्थिएं दी सोच दा विस्तार करने दे उद्देश्य कन्नै शिक्षा मंत्री सकीना इत्तू होरें “वतन को जानो” युवा आदान प्रदान कार्यक्रम दे तैहत् दिल्ली, जयपुर ते अजमेर दे 13एं दिनें दे सांस्कृतिक दौरे आस्तै माली तौरा पर कमजोर तबकें दे 250 विद्यार्थिएं दे इक दल गी झंजी दसिसयै रवाना कीता। समाज कल्याण मैहकमे आस्सेआ केन्द्री गृह मंत्रालय दे सैहयोग कन्नै आयोजित इस दौरे दा उद्देश्य दूर दरेड़े खेत्तरें दे विद्यार्थिएं गी भारत दी बन्न सबन्नी विरासत दे संपर्क च आहन्नना ऐ। मंत्री होरें सब्बने विद्यार्थिएं आस्तै समग्र विकास दे कन्नै कन्नै गुणवत्तापूर्ण ते समावेशी शिखा दे आले सरकार दी वचनबद्धता गी पक्का कीता। उनें विद्यार्थिएं गी अपने अनुभवेनं दा ब्यौरा लिखने ते इस मौके दा पूरा लाह लैने आस्तै प्रोत्साहित कीता।

<><><><><><>

FreeWater Rana

जम्मू च पानी दी कमी आहली समस्या कन्नै निब्वड़ने लेई जम्मू-कश्मीर दी सरकारै, पानी दी किल्लत आहले इलाकें लेई मुफ्त टैंकर सेवा दा ऐलन कीता ऐ। जल शक्ति मंत्री जावेद अहमद राणा होरें इक उच्ची सतह दी जायजा मीटिंग दरान एह ऐलान कीता ते कन्नै इब्बी आखेआ जे बाकी रौहदे इलाकें गी तौले गै जल जीवन मिशन दे दायरे हेठ आहन्नेआ जाह्ग। मंत्री होरें अधिकारिएं गी निर्देश जारी कीते जे ओह प्रभावत इलाकें दे दौरे लान ते पानी दी सप्लाई आहले कम्मै गी चुस्त-दुरुस्त बनान। बैठक दरान अमृत ते जल जीवन मिशन तैहत् जारी परियोजनाएं च हासल प्रगति दी बी समीक्षा कीती गई। मंत्री होरें कंपैक्स तैहत् जारी विकास परियोजनाएं सने बकाया पेदे कम्में गी तेजिआ कन्नै सबूरा करने लेई बी आखेआ। उ‘नें जम्मू च जनजातीय भवन दे निर्माण लेई जिमीं दी शिनाख्त करने दे बी निर्देश जारी कीते। एहदे अलावा बैठक दरान जनजातीय समुदाय दे पूरे-पराते विकास लेई प्रधानमंत्री आदि आदर्श ग्राम योजना दी अमल-आवरी बारै बी टकोहदे तौरा पर चर्चा कीती गई।

<><><><><><>

JMC Swachh Survekshan

स्वच्छ सर्वेक्षण 2025 कोला पैहले साफ सफाई आस्तै इक बड़डा जोर दिंदे हाई जम्मू नगर निगम दे कमीशनर डॉ. देवांश यादव होरें बिजन तरीके कन्नै सुट्टे गेदे कूड़े कचरे गी निबेड़ने लेई कूड़ा हाटस्पॉट चैलेंज दी शुरूआत कीती। जेएमसी दे अधिकार क्षेत्र दे तैहत् बक्ख-बक्ख वार्डें च सफाई दी समीक्षा दे दरान डॉ. यादव होरें कूड़ा सुट्टने आले कसूरवारें खलाफ सख्त कारवाई पर जोर दित्ता ते बसनीकें गी My Jammu ऐपज। जेएमसी दे पोर्टल www.myjammu.in पर कूड़ा हाटस्पॉट दी रिपोर्ट करने आस्तै प्रोत्साहित कीता। इस सुविधा दे राएं 24एं घैंटे दे अंदर अंदर कूड़े गी हटाने दा वायदा कीता गेआ ऐ। अनुपालन गी सुनिश्चित करने आस्तै जेएमसी नै पालमा नेई करने आलें आस्तै 50 ज्हार रपे तगर दे मोट्टे जर्माने दी बी घोशणा कीती ऐ।

<><><><><><>